



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

31 Mai 2019

25 Ramzaan 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

LA GRANDEUR DE LAYLATUL QADR

بِسْمِ اللَّهِ الرَّحْمَنِ الرَّحِيمِ ﴿١﴾ إِنَّا أَنْزَلْنَاهُ فِي لَيْلَةِ الْقَدْرِ ﴿٢﴾ وَمَا أَدْرَاكَ مَا لَيْلَةُ
 الْقَدْرِ ﴿٣﴾ لَيْلَةُ الْقَدْرِ خَيْرٌ مِّنْ أَلْفِ شَهْرٍ ﴿٤﴾ تَنْزِيلُ الْمَلَائِكَةِ وَالرُّوحِ فِيهَا بِإِذْنِ
 رَبِّهِمْ مِّنْ كُلِّ أَمْرٍ ﴿٥﴾ سَلَامٌ هِيَ حَتَّىٰ مَطْلَعِ الْفَجْرِ ﴿٦﴾

Bismillaahir-Rahmaanir-Rahiim; 'Innaaa 'anzalnaahu fii lay-latil-Qadr: Wa maaa 'adraakamaa Laylatul-Qadr? Laylatul-Qadri khayrum-min 'alfi shahr. Tanazzalul-malaaa 'ikatu war-Ruuhu fiihaa bi-'izni-Rabbihim-min kulli 'amr: Salaamun Hiya hattaa matla-'il-Fajr.

« Au nom d'Allah, le Très Gracieux, le Très Miséricordieux. Vraiment, Nous fine faire (le Quran) dessane pendant la Nuit du Destin. Et ki pou faire toi conner ki été sa la Nuit du Destin ? La Nuit du Destin li meilleure ki mille mois. Bane anges et l'Esprit dessane pendant sa la nuit là, par permission zot Maître, avec tout bane l'ordre. C'est la paix, ziska ki soleil levé. » (Al-Qadr 97: 1-6).

Ene jour le Saint Prophète Hazrat Muhammad (saws) ti pé raconte la vie d'ene dimoune pieux (*Wali*) ki ti appelle Shamsoon (ra) ki ti vive parmi bane Bani Israïl. Sa dimoune là ti pé faire toutes sortes kalité de bane actes d'adorations (*Ibaadat*) et li ti faire aussi le *Jihad* (la guerre sainte), tous sa pendant ene durée de 1000 mois. Kan ene *Sahabi* (compagnon) fine entendre sa zistoire là, li fine faire sa remarque là avec le Saint Prophète (saws) ki longueur la vie de so *Ummah* (communauté) li moin longue ki celui de Hazrat Shamsoon (ra). Et sa *Sahabi* là fine aussi dire ki nous pas pou capave alor faire même quantité *Ibaadat* ki Hazrat Shamsoon (ra). C'est à ce moment là ki Hazrat Jibra'il (as) fine paraîte et fine récite le Surah Al-Qadr (Le Destin).

BANE BÉNÉFICES DE LA NUIT D'AL-QADR

D'après Hazrat Abu Huraira (ra) et bane les autres rapporteurs de Hadiths, le soir de Laylatul Qadr, beaucoup bane anges dessane lors la terre et en vue de zot descente, bane la portes les ciels ouverts. À ce moment-là, bane la lumières briyé, bane manifestations spéciales produire, et le monde céleste (du ciel) li dévoilé. Bane dimounes capave alor contempler li dans bane degrés différents (sakaine d'après zot capacité ki Allah fer zot trouver – sakaine d'après niveau de zot *Imaan*).

Ena dimounes ena la capacité pou trouve le royaume de bane les ciels et la terre, et kan zot guette les ciels, zot capave alor trouve bane anges ki pé faire bane différents actes d'adoration, kot certains de sa bane anges là zot dans bane différents position de *Salaat*, c'est-à-dire, certains dans *Qiyam*, bane les autres dans *Ruku*, les autres dans *Sijda*, certains pé faire *Zikr*, bane les autres pé faire *Shukr* (remercier Allah), et bane les autres encore pé récite *Tasbih* [*Subhan Allah*] et *Tahlil* [*Laa-Ilaaha Illallah*] etc.

Bane les autres dimounes trouve le Paradis, avec so bane palais et so bane la cazes, houris, la rivières, piés et so bane fruits etc. et ena même capave trouve le Trône (*Arsh*) d'Allah ki représente le Toit du Paradis. Zot trouve aussi bane stations (rangs) de bane prophètes, bane *Awliya*, bane martyrs, bane véridiques. Ena aussi ki gagne la faculté de la part d'Allah pou soulève le voile et trouve la splendeur de la beauté de zot Rab ki rempli de Miséricorde. Dans sa bane cas là, c'est ene Manifestation d'Allah ki zot trouver. Beaucoup trouve Allah couma ene la lumière bien brillant, tellement brillant ki pas capave guette Li-même, et

d'autres capave trouve Allah en forme humain, ou couma ene Néant – c'est-à-dire, ene l'espace vide, parski Allah Li dans nous et tout autour de nous. Li rempli tout l'espace ki Li fine créer. Sa c'est bane Manifestations d'Allah pou ki Allah montrer et fer ressenti So présence à So bane Élu, bane dimounes ki Li content et ki Li envie donne sa faveur là.

D'après ene Hadith rapporté par Hazrat Aisha (ra), Rassoollullah (saws) ti pé faire beaucoup plisse zéfforts (dans *Ibaadat*) dans 10 derniers la nutes (Ramzaan) comparé à bane les autres la nutes. (Muslim, Mishkaat).

D'après plusieurs Hadiths, Laylatul-Qadr trouve parmi bane la nutes impaires de 10 derniers la nutes de Ramzaan (21, 23, 25, 27 et 29). Hazrat Aisha (ra) rapporté ki Hazrat Muhammad (saws) ti pé pratique le **Ittikaaf** dans dix derniers la nutes Ramzaan et li (saws) fine dire : « *Rode la Nuit d'Al-Qadr au cours de bane dix derniers la nutes mois Ramzaan.* » (Bukhari).

Abu Huraira fine rapporté: Rassoollullah (saws) fine déclaré: « *Quiconque établir bane la prières (Salaat) pendant la nuit de Qadr avec ene la foi sincère et avec l'espoir pou recevoir bane récompenses de la part d'Allah [non pas pou montrer lizié dimounes] ; so bane péchés pou pardonné.* » (Bukhari).

Dans ene l'autre Hadith rapporté par Hazrat Aisha (ra), Hazrat Muhammad (saws) fine conseille li pou répète récitation de sa *duah* là en abondance si arriver li trouve le Laylatul Qadr. Sa *duah* là c'est : '**Allahoumma innaka afouwwoun touhibboul afwa fa'fou-anni.**' - Ô Allah ! To le Pardonneur et To content pardonner ; alor pardonne-moi. (Mishkaat, Ibn Maja, Tirmidhi).

Alor nous faire *duahs* ki Allah accepter nous bane repentir et accorde nous bane faveurs illimité de Laylatul Qadr. Heureux à tous bane membres sincères du Jamaat Ul Sahih Al Islam ki Allah fine choisir zot pou reconnaître l'Imam de l'heure, et pou montrer zot l'obéissance envers Allah et So Messenger, le Khalifatullah, ki fine vini avec le *Ruh'il Quddus*, dans la Nuit de l'Ignorance ki fine enveloppe sa le monde là dans sa siècle là.

Alhamdulillah, la vie et présence d'ene Messenger d'Allah ki recevoir la révélation divine pou partage au monde et pou reforme sa le monde là li ene Laylatul Qadr continuel aussi. Sa au fait c'est vrai Laylatul Qadr ki zot, mo bane disciples fine

recevoir kot zot pé vivre sa bane moments là, et pareil couma dans l'époque de Rassoollullah Hazrat Muhammad (saws) et de Hazrat Massih Maoud Mirza Ghulam Ahmad (as), azordi jour zot aussi zot pé gagne bane manifestations de bane miracles d'Allah lors zot-mêmes et zot familles, zot zenfants, zot la caze, et lors zot propres lécorps et l'âmes, kot Allah fine donne zot bane *Kashafs* (visions) et rêves extraordinaires, fine donne zot la capacité pou entendre bane anges et aussi gagne la révélation, et bane conseils et instructions divines. **Masha-Allah. Subhan-Allah, Allahu Akbar.** Zot trouver ! Kan zot fine soumette à la volonté d'Allah et fine reconnaite So Messenger, zot fine attrape ene la corde solide, et certainement c'est Allah So Parti (bane *Hizbullah*) dans le Jamaat Ul Sahih Al Islam ki pou victorieux, *Insha-Allah*. C'est sa vrai l'obéissance ki bane croyants sincères d'Allah bizin démontrer, ki à sak fois Li envoie So Messenger, So Khalifatullah avec le *Ruh'il-Quddus*, ki proclamer ouvertement au nom d'Allah, ki amène ene renouveau de l'Islam pou tous bane ki fine perdu le chemin ki mène vers Allah.

Alors, mo dire zot, mo bane disciples, continuer avec zot bon travaux. Pas peur les autres ki pou dire, ki pou penser. Zot, zot fine gagne ene bénédiction extraordinaire kot bane anges pé dessane lors zot et fine transforme zot les cœurs pour soutenir la vérité. **Masha-Allah. LAYLA-TUL-QADR MUBARAK !**

Avant mo terminer, mo ti ena pou partage avec zot quelques **ANNONCES** très importants :

1. AFFAIRE CHAGOS : Après la victoire à l'ONU, Premier Ministre de Maurice, Pravind Jugnauth et so délégation fine être accueilli couma bane héros à l'aéroport de Plaisance, Samedi le 25 Mai dernier. Zot pé réjouir ki 116 pays membres de l'ONU fine voté en faveur de résolution de Maurice lor dossier Chagos, Mercredi le 22 Mai soir dans New York. 56 pays fine abstenir pou voter et seulement 6 nations fine vote contre sa résolution là.

Nous bizin mazer ki en 2017, beaucoup de bane pays européens ti abstenir pou voter, mais cette fois-ci zot fine voter - bane pays couma l'Autriche, la Grèce, L'Irlande, La Suisse etc.

Kan nous guette sa, nous trouver ki théoriquement parlant, nous pays (l'île Maurice) fine gagne ene victoire écrasant après ki l'assemblée générale de bane Nations-Unies fine établir bane modalités ki vise pou complète la décolonisation

pour Royaume-Uni kot li fine mette fin à so l'administration dans l'archipel de Chagos dans six mois.

Sa c'est vraiment ene très grand victoire pour la République de Maurice dans so l'ensemble, et aussi pour tous bane citoyens de Chagos, parski sa bane là, c'est-à-dire, bane Chagossiens ti gagne expulser de zot pays, et kot Maurice ti bizin rende Chagos dans so combat pou gagne l'indépendance. Sa ti ene épisode sombre dans l'histoire de Maurice et de l'humanité dans so l'ensemble. Mo bien déçu ki l'Angleterre (UK) pé tini tête lor so position pou pas rende Chagos !

Et bien évidemment, sa aussi li ene stratégie politique, vue ki pou ena élection générale à Maurice très bientôt. Le Premier Ministre et so Gouvernement conne très bien couma pou dévier l'attention de bane Mauriciens lors Chagos et pou montrer sa Premier Ministre là couma ene Héros. Tous bane gouvernements dans le passé, zot aussi fine lutter pour faire Royaume-Uni retourne l'archipel de Chagos. Malgré tous sa bane stratégies politiques là, nous bien content ki sa la lutte pour ene re-gain d'humanité fine réussi et de ce fait li ene très grand victoire, pas seulement pour Maurice, mais pour tous sa bane pauvres Chagossiens ki fine forcer pou abandonne zot pays.

Mais astaire là, cher Premier Ministre... pas prend nous - le peuple Mauricien - couma ene imbécile. Vine de l'avant pou explique nous saki pé tramer pou Agaléga ! Expliquer saki pé passer entre Maurice et l'Inde, entre ou et le Premier Ministre Narendra Modi. C'est pas possible ki l'Inde pou alle investi tant de l'argent dans Agaléga, construire ene Airport et bane les autres développements, dans ene l'île - et li quitte so pays, so bane peuples ki pé souffert - pour nannié. Ena anguille sous roche.

2. ATTAQUE CONTRE L'ISLAM : Monsieur le Premier Ministre, ou Ministre Anil Gayan (Ministre du Tourisme) fine dire bane paroles ki fine blesse la Communauté Musulmane. Li fine attribuer bane faussetés à l'Islam et li fine même faire allusion à « *Honour Killing* » au sein de la Communauté Musulmane. Sa li ene incitation à la haine raciale. Sa bane propos là zot insultants et dénigrants. Sa capave nuire à l'harmonie du pays. Couma eski ene Ministre capave dire bane paroles pareil ? Ki l'exemple li pé donner à la nation mauricienne ? Eski nous pas ene pays arc-en-ciel (multiculturel) ? Eski nous pas ti bizin ene modèle ?

Donc, le Premier Ministre Pravind Jugnauth bizin prend bane sanctions contre sa Ministre là et pou demande li pou 'step down' pou calmer tension raciale dans ene tel mois béni couma Ramzaan. Et moi, en tant ki le Khalifatullah, mo lance ene appel à tous mo bane frères et sœurs musulmans de l'île Maurice, quel que soit ki Jamaat ou appartenir, garde zot calme, prend patience. Nous dans ene mois béni, ene mois de patience dans tous so l'aspé. Et montrer vrai valeur de l'enseignement de l'Islam et Allah So Prophète, nous bien-aimé Rassool Hazrat Muhammad (saws) et vrai valeur du Quran Shareef, Allah So Livre Sacré. Mo conner ki li révoltant kan nous trouver ki dans 5 Masjids à Maurice, bane malfaiteurs fine écrire bane paroles malpropres contre bane musulmans, mais Allah pou conne faire So Justice. Nous nous dans ene mois béni, ene mois de sacrifices intenses pou réforme nous en bane dimounes meilleures. Sa c'est ene situation critique kot astaire là nous bizin conne contrôle nous, malgré grand la peine ki nous pé faire face, et nous montrer nous l'obéissance envers Allah et So Prophète (saws), *Insha-Allah*. Mo compte lors zot tous, ki pas zis dans Ramzaan nous montrer sa l'obéissance mais après Ramzaan aussi. Nous montrer ki nous la foi li ene meilleure la foi, et ki nous bane modèles parmi toutes l'humanité. *Insha-Allah*.

3. CALAMITÉ : Couma zot conner, cyclone Kenneth fine faire ravage dans Comores. Plisse ki 50,000 dimounes fine affecté par passage de sa cyclone là. Sa cyclone là fine faire bane dégâts énormes. Bane zanimo fine emporter par bane vagues, l'agriculture fine ravager, plisse ki 4200 zenfants priver de l'école, des milliers de bane la cazes fine détruire ; pas ena manger et boire. Pas ena de l'eau potable [ki capave boire – ki pure] pou boire. Pas ena électricité. La route impraticable. C'est le devoir du Jamaat Ul Sahih Al Islam pou apporte so l'aide à sa bane dimounes là et soutenir zot le plus vite possible, *Insha-Allah*.

Ki Allah gagne pitié lors bane musulmans et l'humanité dans so l'ensemble. Ki la vérité ki Allah faire briyé, li briyé en toute justice et ki bane malfaiteurs zot réalise zot bane erreurs et zot retourne vers le droit chemin. Ki Allah dirige nous les cœurs pour faire le bien et pou récolter So plaisir. *Ameen*. Nous contigner mazine sa bane dimounes ki pé souffert là dans nous *duahs* et nous prier ki Allah aide toujours so bane *Banda* (serviteurs) sincère pou remporte la victoire lor le mal ki Shaytaan et so l'armée rode répanne. *Insha-Allah*, nous réussi dans nous travail avec l'aide puissante d'Allah. *Insha-Allah, Ameen*.